

Das erste Buch/

Wie man die Probirgewicht von
Silber oder Messing machen vnd abtheilen soll/
vnd erstlich die Gren/Pfenning vnd Karat
Gewicht.

Derweil beydes an der machung vnd außthei-
lung der Gewicht / nicht wenig gelegen / Muß ich fermer
anzeigen wie vnd wovon dieselben am besten zu zurichten
seyn / Erstlich ist besser daß sie von gutem Silber gemacht
werden/als von Messing / dann das Silber schmutzt nicht / laufft auch
nicht so gern an als der Messing/sonder bleibt allwegen sauber vnd rein/
So man nun das Silber an ein zainlein gegossen hat / soll man viere-
ckichte stücklein darauß schlagen / in der Proportion vnd groß / darnach
ein jedes stücklein Probir gewichts schwer oder leicht wegen solle / vnd
solche ganz sauber vnd rein feilen / vnd folgents auff einem Beckstein
glat ziehen / darneben oftmals auff der Probirwag ein jedes insonder-
heit/gegen der Abtheilung mit fleiß auffziehen/ damit wo es noch etwas
zu schwer wer/daß mans leichter vnd gerecht machen kündt/vnd leblich
just innen stehe.

Es vermeinen aber etliche Probirer / man soll die Probirgewicht
von oben herab / als vom größten bis auff's kleinste machen vnd abthei-
len/Etliche aber dargegen vom kleinsten bis zum größten/ Darauff wisse
se daß es folgender gestalt am besten sey/Wann man Probirgewicht von
neuem zu richten vnd machen wil/soll man die von oben herab/vom grös-
sten bis auff's kleinste stück abtheilen/vmb des willen/daß man am gros-
sen stück die gewisse schweren einer Marc / besser vnd rechtschaffner ha-
ben kan/als wann man vom kleinsten/von der halben Gren/oder Hel-
ler anhab/vnd ein Gewicht darvon machen solt/da entweder die Marc
viel zu schwer/oder viel zu leicht werden würd/als man begert hette / vnd
in dem bald zu fehlen were. Derhalben soll man zu solcher Abtheilung
von oben herab/klein gekürnt/durchgesibt/gewaschen Kupffer brauchen/
durch welches zu sehē/wie viel man einem stück das noch etwas zu schwer
wer/abnehmen vnd wegfeilen müste / Vnd wann nun solch Probirge-
wicht gar fertig ist/so solle es alsdann von unten auff/ vom kleinsten bis
auff's größte / mit fleiß auff einer schnellen guten Probirwagen auffgez-
ogen/vnd so noch mangel daran wer/der dann nicht groß seyn kan/vollent
getwendet werden.

Gewisse
schwere ei-
ner Marc.

Probirge-
wicht auff
zuziehen.

Wie